

2 KORĪN

Jesus hã h'yy ka'eeh do panang Korĭn hãd nãng doo bã
habong do hã ta jawén Paw-Ro ma erih do hahỹyh

Kedëng do ky n'aa hahỹyh

1 Paw-Ro ỹ ti hỹyh, P'op Hagã Do karĕn do hyb n'aa ỹ tanaëenh doo, Kristo Jesus mejũũ do see ỹ bahado dãk hyb n'aa, ta ky n'aa ỹ baher'ood hõm hyb n'aa kã. Ēr hỹj hadoo do Tsimoot hãd nãng do sii bẽ ỹ edëng bëeh, P'op Hagã Do karapee hedoo doo, Korĭn hãd nãng do panang bã habong doo. Sahõnh hẽ Akaja hãd nãng do hãj n'aa bã P'op Hagã Do tsyt hẽ ta wẽ tabasëew hõm do aã edëng na-ããj hẽ.

² Ỹ karĕn P'op Hagã Do ër Yb, Jesus Kristo Tak'ëp Hyb N'aa Jawyk Do na-ããj hẽ ky en'yyim bẽ hã. Ỹ karĕn baad bẽ rah'yyb en'yyim.

P'op Hagã Do ji tah'yyb en'yyim do ky n'aa hahỹyh

³ Taw'ããts hẽ ër j'aa etsë P'op Hagã Doo, ër Wahë N'aa Jesus Kristo h'yy kaha'eeh doo, ta Yb. Ti né hẽ ji yb ji hã t'yyd mehĩĩn doo. Ti né hẽ P'op Hagã Do ji tah'yyb enãw had'yyt doo. ⁴ Sahõnh hẽ baad nadoo do aã wẽ tadëë bã, aã tah'yyb enãw had'yyt hẽ, ta wób aã bahajaa hyb n'aa aã h'yyb en'yyim hyb n'aa, baad nadoo do sa wẽ tadëë bã, aã hã P'op Hagã Do h'yyb en'yyim doo me.

⁵ Jesus ahoop do aã wẽ tabës doo da, aã wẽ tabës na-ããj hẽ Jesus Kristo hyb n'aa P'op Hagã Do ër tah'yyb en'yyim doo. ⁶ Nesaa do aã ahob bã, bẽ hyb n'aa né hẽ ti aã bahoop. Bẽ h'yyb enyyim hyb n'aa tii, bẽ bedëp hyb n'aa nesaa do mahãnh na-ããj hẽ. P'op Hagã Do aã tah'yyb en'yyim bã, bẽ hyb n'aa né hẽ ti aã tah'yyb en'yyim doo. H'yyb jawyk doo me aã ahoop do aã gadoo bẽ bahapãh bã, bẽ da h'yyb enyyw bok. Ti hyb n'aa, h'yyb jawyk doo me bẽ gado had'yyt hẽ da nesaa do bẽ ahoop doo. Jesus hyb n'aa aã ahoop doo, ti né hẽ bẽ ahoop na-ããj hẽ. ⁷ Baad aã bahapãh hahỹ bẽ hã: Aã nemuun bẽ ahob bã aã ahoop doo, ji P'op Hagã Do h'yyb en'yyim do bẽ gadoo aã nemuun na-ããj hẽ. Ti hyb n'aa, dooh bẽ h'yy gejë hõm bã Jesus hã aã hapãh, nesaa do bẽ ahob né paawã.

⁸ Wakãn haa, ỹ karĕn bẽ bahapãh tak'ëp nesaa do Asija hãj n'aa bã aã wẽ kajaa doo. Tak'ëp né hẽ ti nesaa do aã hã kametyy doo. Dooh aã haja wãd bã ta hã. Dooh paa aã gadaa bã aã edëp doo.

⁹Ãã d' dejëp ãã ed'oo paa ãã h'yyb gó. Ãã wë ta ti wén wäd wät, ãã hã hë ãã h'yy kanasadä hyb n'aa, P'op Hagä Do hã, dejëp do genyy bong do anoo do hã, ãã h'yy kasadä hyb n'aa kä. ¹⁰Ti né hë tii, dajëb mahãnh ãã tedëeb wät doo. Ãã d' ted'ëep nä. Ta hã ãã h'yyb eh, ãã ted'ëep hÿ jawén ¹¹ãã bë masaa bä, ãã bë ky n'aa etsëe doo me. Tii bä kä, hajök raj'aa etsë da P'op Hagä Doo, ãã ted'ëep do hyb n'aa, hajök do sa kyyh P'op Hagä Do gadoo do hyb n'aa.

Paw-Ro maher'oot do h'ëed hyb n'aa tawén

ky kahÿÿd wät sa hã ky n'aa hahÿÿh

¹²Hahÿ hyb n'aa ãã kasab'ee: J'ooj madäk doo me nado ãã baboo bong bë mahang, ta wób sa mahang na-ããj né hë. Baad ãã h'yyb metëeh ta ti ãã hã. Dooch ãã jejën bä ãã h'yyb. Tii da ãã wén bok, P'op Hagä Do ky ennym do hyb n'aa ãã wë. Dooch badäk hahÿÿ hã habong do hajaa do hã ãã h'yyb ee bä. ¹³⁻¹⁴Dooch kejën pé bë ãã ma erih do mahang. Wyt ta maab hë bë ÿ ma erii wät do ky n'aa, nyy d' tahanäng péh. Bë ner'oot doo, bë maa napäh do na-ããj né hë, ti né hë. Dooch kejën péh. Hÿÿ kä, bë häd hapëe däg né paawä ãã h'yyb, ÿ gada da baad ãã h'yyb bë bahapäh nä, Jesus Tak'ëp Hyb N'aa Jawyk Do matëeh noo gó kä, ãã hyb n'aa bë h'yy kasab'ee hyb n'aa, bë hyb n'aa ãã h'yy kasab'ee doo da ti noo gó.

¹⁵Hëp ÿÿ bë hapäh ÿ ed'oo do hyb n'aa, hã ÿ bë h'yy ka'eeh ÿ ed'oo do hyb n'aa na-ããj hë, ÿ hyb n'aa newë däk paa bë ÿ bahehëen Masedonija bä ÿ kajaa do pooj jé. ÿ hyb n'aa newë wät paah, pawóp nuu me bë ÿ bahehëen paawä, pawóp nuu me baad hadoo do hyb n'aa bë hã paawä. ¹⁶ÿ h'yyb däng paa Masedonija hënh ÿ mahôm me bë ÿ bahehëen, ÿ matëeh me na-ããj hë, ÿ bë masa hyb n'aa Judah häj n'aa hënh ÿ bahôm bä. ¹⁷Tii d' né ÿ h'yyb dëe paawä, ÿ ky kahÿÿd wät. Daap ÿ h'yyb däng bë ed'oo g'eeh, ÿ wén ky kahÿÿd wät? J'ooj madäk doo me bë ed'oo g'eeh “ÿÿ” ÿ banäng, hëp ÿÿ gó “dooch”? Ky kahehät do bë ed'oo ÿÿh? ¹⁸Bë hã ÿ her'oot doo, ta ky n'aa bë ÿ maher'oot do na-ããj né hë, ky kahÿÿt do nado. P'op Hagä Doo, ji hã ky kanehÿÿt doo, ji hã h'yy kanehÿÿt doo, hapäh te hub né hë ÿ her'oot doo. ¹⁹P'op Hagä Do T'aah, Jesus Kristo, ta ky n'aa bë mahang Siras, Tsimoot sa daheeh ÿ maher'oot doo, dooch taky kahÿÿd bä ji hã. Taky däng doo, ti né hë tamoo wäd had'yyt hë. Ti hadoo ããh, ta ky n'aa rod hedoo doo. ²⁰Sahôn hë P'op Hagä Do ky n'aa enooh do ji hã, Kristo moo wäd wät.

Ti hyb n'aa, P'op Hagä Do ër j'aa etsë bä, “ÿÿ. Tii d' né hë. Taw'ääts hë”,^a ër wén näng ta hä, Jesus Kristo häd gó. ²¹P'op Hagä Do né hë tii, ääh, bë na-ääj né hë baad tah'y'yb ta däk do Kristo hä, ër h'y' kanerét hyb n'aa ta hä. Ää hä tah'y'yb däng, tsyt hë ta wë ää moo bok hyb n'aa. ²²Ër ta ma däg tan'oo bä. Tan'oo däk dó ër h'y'yb gó ta Sahee, ta jawén, hÿ pong jé ër gadoo do metëë n'aa.

²³P'op Hagä Do hä ÿ ky däng hahÿÿh: Bë hyb n'aa né hë, bë ÿ nahajëm hyb n'aa, bë panang hënh ÿ wén nahöm wät p'aa hënh. Né hup ÿ né hë ti ÿ her'oot doo. ²⁴Bë ää karën ää mejüü hyb n'aa nado bë h'y' kaha'eeh do hä ÿ wén näng ta tii. Baad bë h'y' kae däg kån Jesus hä, ää hapäh. Jääm hë ää karën bë ää masa, baad bë tsebë hyb n'aa.

2 Ti hyb n'aa, hëp ÿÿ gó ÿ ky hadoo hahÿÿ da: “Dooh ÿ ahöm wäd bä sa wë ÿ bahehëen hyb n'aa”, näng ÿ hëp ÿÿ gó. Dooh ÿ karën bä bë ÿ bahehëen do bë h'y' ketón tan'oo bä.^b ²Bë h'y' katón do ÿ an'oo bä paawä, jaa hanaa tii bä ÿ tsebë doo? Bë né hë ti tsebë do hanoo do hä ÿÿ. ³Ti hyb n'aa né hë, pooj jé bë ÿ ma erii wät doo gó, ta tii da bë ÿ wén ma erii wät, bë wë ÿ kajaa bä kä, ÿ h'y' katón bë an'oo mahãnh hä ÿÿ, bë paawä ti tsebë do hanoo do hä ÿÿ. ÿ tsebë doo da bë da tsebë nemon ÿÿ, baad ÿ gada bë sahõnh hë wë. ⁴Tak'ëp ÿ h'y' katón doo gó, ÿ aoot doo me ta ti bë ÿ ma erii wät paah. Bë h'y' katón ÿ an'oo bä do hyb n'aa nado bë ÿ wén ma erii wät, pooj jé ÿ erii wät do hä. Bë ÿ wén ma erii wät, tak'ëp bë ÿ kamahãn ÿ erii wät do hä bë bahapäh hyb n'aa.

Ji hyb n'aa mabaan do ky n'aa hahÿÿh

⁵Ta ti aj'y'y, bë mahang ji h'y' katón do du na doo, ÿ had'y'yt hë nado ti h'y' katón tan'oo bä. Hajök bë wób h'y' ket'oon tan'oo bä. Dooh ÿ karën bä ÿ her'ood bä, bë sahõnh hë bë h'y' ket'oon tan'oo bä, ta bahãnh ÿ naher'oot hyb n'aa. ⁶Hÿÿ kä, ta ti aj'y' hã kä, jääm né ti hajök bë wób ta hä nesaa do ky n'aa etyy doo.^c ⁷Taw'ääts hë bë hyb n'aa mabaan hÿÿ kä tamoo wät do paah. Taw'ääts hë bë h'y'yb enäw ta hä, tah'y' ganajëë hõm hyb n'aa

^a 1.20 P'ooj ub, da hë na-ääj nä, P'op Hagä Do ji j'aa etsë bä, Amen ta wób resok. “ÿÿ. Ti d' né hë. Taw'ääts hë” tahanäng pé ti amen.

^b 2.1 Korín buuj Paw-Ro bahehëen bä paawä ti noo gó, Korín buuj Paw-Ro nabuuj gedo paawä baad ranabok do hyb n'aa. Ti hyb n'aa ta tii da Paw-Ro wén erii wät.

^c 2.6 Jääm né tii Paw-Ro wén her'oot, ta ti aj'y' t'yyd kamehÿin wät do hyb n'aa, nesaa do teréd hõm do hyb n'aa.

tak'ëp tah'yy katón do an'oo bã. ⁸ Ti hyb n'aa tak'ëp ÿ betseẽ bë hã, bë metëeh hyb n'aa ta hã bë kamahãn doo. ⁹ Bë ÿ wén ma erii wät paah, aj'yy nesaa do moo wäd wät do bë ky n'aa etyy hyb n'aa, bë ÿ metyy hyb n'aa, ÿ bahapäh hyb n'aa ÿ bë ky dahé bã. ¹⁰ Bë hyb n'aa mabaan bã ta ti aj'yy moo wäd wät do paah, ÿ na-ãäj da ÿ hyb n'aa mabaan ta hã. ÿ hyb n'aa mabaan doo, tanyy bã ÿ hyb n'aa mabaan péh, ÿ hyb n'aa mabaan tii, Kristo matym gó, baad tabadoo hyb n'aa bë hã. ¹¹ Tii da ÿ wén d'oo, Nesaa Do Yb ër tawanadii hyb n'aa.^d Baad ër bahapäh né hë nesaa do tahyb n'aa newëe do ji hã.

Tiit Paw-Ro esoos do ky n'aa hahÿÿh

¹² Panang Torowas häd näng doo bã ÿ kajaa bã Kristo ky n'aa hanäm do ÿ maher'oot hyb n'aa, tyw n'aa näng ta tii bã hã ÿÿ, baad ÿ maher'oot hyb n'aa ta ky n'aa Tak'ëp Hyb N'aa Jawyk Do an'oo bã. ¹³ Ti hadoo né hë, dooh baad tado nä bã hëp ÿÿ, Tiit, hãj ÿ hadoo do tii bã ÿ mamuun ÿ ed'oo doo, ÿ naw'yyt do hyb n'aa. Ti hyb n'aa ÿ kedëe hõm sa hã. Ti Masedonija häj n'aa hënh ÿ bahõm kan, Tiit ÿ besoos hyb n'aa.

J'aa ketsë do ky n'aa gó Paw-Ro eh'üüm do ky n'aa hahÿÿh

¹⁴ P'op Hagä Do hã ÿ j'aa etsë, ãã tamahüüm hado had'yyt hyb n'aa Kristo sii, Kristo j'aa ketsë do tametëeh bã kä. Jé pad'yyt hë, ãã hyb n'aa P'op Hagä Do maher'ood hõm Kristo ky n'aa, buu benyym do jé pad'yyt hë bewäd däk do hadoo.^e ¹⁵ P'op Hagä Do hã, Kristo buu benyym do hadoo ãã banesaa do mahãnh hedëp do sa mahang, banesaa hënh hah'üüm do sa mahang na-ãäj né hë. ¹⁶ Banesaa hënh hah'üüm do sa hã,^f dajëp do babuu hadoo ããh. Banesaa do mahãnh hedëp do sa hã, Kristo ky n'aa ky dah'eeh do sa hã, hedëp do babuu hadoo ããh. Dooh hajaa pé ta daaj hë ta hejój gó ta ti tamoo wäd bã. ¹⁷ ãã wén hajaa tii, P'op Hagä Do anoo do hyb n'aa ãã hã. Dooh ta sãm jawén ãã maher'ood hõm

^d 2.11 Ji kanarën bã ji hyb n'aa mabaan do ji da hadoo do hã, Nesaa Do Yb hã ji anoo tii bã ta tyw n'aa ji tawadii hyb n'aa. Ti hyb n'aa taw'ääts hë ji mabaan ji da hadoo do moo wät doo.

^e 2.14 Rakaneb'ooh do jawén paa bã, raj'aa ketsë bã, tsebee gó Roma buuj sa warahén wahë n'aa sa warahén sii hë rakametëeh rabajëk bã panang hënh. Buu benyym do rejuu ti noo gó. Jé pad'yyt hë ratabë bã buu benyym do bewäd däk. Ta ti ky n'aa gó Paw-Ro beh'üüm Jesus ky n'aa taher'ood hõm doo. Warahén sa wahë n'aa j'aa ketsë do hadoo ti Kristo. Ta sii P'op Hagä Do mahüüm hadoo Paw-Ro, ta wób Jesus mejüü do na-ãäj hë, ta t'aah j'aa ketsë do ky n'aa ramaher'oot hyb n'aa.

^f 2.16 Kristo ky n'aa ky nadah'eeh do ti banesaa hënh hah'üüm doo.

P'op Hagä Do ky n'aa, hajök ta wób rabahed'oo doo da. Séd äã h'yyb hedoo Kristo hä. T'öp hanäng doo me äã baher'oot P'op Hagä Do matym gó, P'op Hagä Do mejüü do äã bahadoo do hyb n'aa.

3 P'aa hënh äã daaj hë äã j'aa etsë bë ed'oo g'eeh ta ti ý erii wät do hyb n'aa? Äã hyb n'aa karën g'eeh, ta wób rabahed'oo doo da, äã manaa bë hä sa mo haj'aa kerih doo, rerii wät do bë ner'oot jawén paa bä, baad äã bë gadoo hyb n'aa? Bë mo haj'aa kerih do äã hyb n'aa karën pé apäh, ta wób rabahed'oo doo da, panang s'ee hënh baad äã ragadoo hyb n'aa? Dooh. ²Dooh hyb n'aa äã karën pé ta wób mo haj'aa kerih doo, baad äã ragadoo hyb n'aa sa wë. Bë hä né hë sahõnh hë rabahapäh nyy da äã babok, nyy da äã ma metëek. Baad däg bë baboo däk bë äã ma met'ëeg wät do hyb n'aa rabahapäh bä, äã d' ragadoo. Baad bë babok do hä äã h'yyb kametä däk. ³Wyt ta maab hë: Bë hä Kristo ky n'aa äã ma met'ëeg wät do hyb n'aa, Kristo mo haj'aa kerih do hado däk bëeh, ta wób hä kametä däk doo. Dooh ta nahëe me kerih do tado bä tii. P'op Hagä Do hedëb had'yyt do Sahee bë h'yyb gó taban'oo däk P'op Hagä Do ky n'aa jaw'yyk doo, ý hanäng doo. P'ooj ub, pä gatsebak do hä takerii däk paa ta ky n'aa jaw'yyk doo. Hÿÿ kä ji h'yyb gó tabawäd däg kán, ji tah'yyb mahüüm hyb n'aa.

⁴Bë äã ma met'ëeg wät do hyb n'aa, Kristo hä bë h'yy kae padëek baad äã bahapäh P'op Hagä Do matym gó Kristo an'oo bä. ⁵Ti hadoo né hë, äã daaj hë hyb n'aa nado tii. Äã daaj hë, dooh äã hajaa péh. P'op Hagä Do hanaa äã hajaa doo. ⁶Ti né ti hanoo äã hä, papuuj taky n'aa enooh do ky n'aa panäg n'aa äã bahadoo hyb n'aa. Pooj jé taky n'aa enooh do kerih do nahado papuuj taky n'aa enooh doo. Papuuj hä, P'op Hagä Do Sahee moo wät hÿÿ kä ji h'yyb tym gó. Pooj jé kerii däk do paah, ji h'yyb tym dajëp tan'oo bä.⁸ Papuuj taky n'aa enooh do hä kä, ji h'yyb tym ted'ëep P'op Hagä Do Sahee an'oo bä kä.

⁷P'op Hagä Do bag tak'ëp gabarëeh do mahang ta ky n'aa jaw'yyk do kajaa, pä gatsebak do hä kerih do paah. Dajëb hä ji taky n'aa ety né paawä, gabarëeh do mahang takajaa. Tak'ëp gabarëeh do hyb n'aa, dooh paa m' Isaraéw buuj rahaja bä bap peej Mosees mamets rahegää bä ta ky n'aa jaw'yyk do tagadoo

⁹ 3.6 Ji h'yyb tym dajëp tawén näng, ji nahajaa do hyb n'aa ji ky dahé bä sahõnh hë P'op Hagä Do ky n'aa jaw'yyk do Mosees hä kan'oo däk do paah. Ji ky nadaheeh do hyb n'aa, ji taky n'aa ety dawëe had'yyt hë P'op Hagä Do mahänh ji h'yyb tym bawät hyb n'aa, tak'ëp nesaa do ji h'yyb tym ahob had'yyt hë hyb n'aa.

noo gó, gabarëeh do ta mamets hã kametëeh do kahäj né paawä. ⁸Hÿÿ kä, tak'ëp ti bahãnh tabahetsooh, baad ub, papuuj ji hã P'op Hagä Do ky n'aa enooh doo, ta Sahee ji h'yyb gó moo wät doo, ji h'yyb tym hedëp do hanoo doo. ⁹Ti hyb n'aa kä, baad ub tado bä paa P'op Hagä Do ky n'aa jaw'yyk doo, dajëb hã ji taky n'aa ety né paawä, tak'ëp tii bä ta bahãnh baad ub, tabahetsooh hÿÿ kä papuuj taky n'aa enooh doo kä, baad däg ji h'yyb tym P'op Hagä Do matym gó hanoo doo. ¹⁰Tak'ëp né hë ta bahãnh baad ub, tak'ëp ta bahãnh tabahetsooh ta ti papuuj ji hã taky n'aa enooh doo. Ti hyb n'aa ta tii hã ji mety bä, dooh wäd its hÿÿ kä ta ky n'aa jaw'yyk do p'ooj ub kan'oo däk doo. ¹¹Gabarëeh do mahang kaja däk paa kah'ëenh doo, pooj jé P'op Hagä Do ky n'aa enooh do ta ky n'aa jaw'yyk doo. Ti hyb n'aa tak'ëp ta bahãnh tabahetsooh, baad ub, papuuj taky n'aa enooh do nahãnh doo.

¹²Tak'ëp ta bahãnh tabahetsooh, baad ub, papuuj taky n'aa enooh do baad äã bahapäh do hyb n'aa, neÿÿm doo me baad äã baher'oot ta ky n'aa. ¹³P'ooj ub, P'op Hagä Do kyyh Isaraéw buuj sa hã Mosees maher'oot jawén paa bä, ta mamets tajahes'uu pãän sawas'aap doo me, gabarëeh do kah'ëenh do ta mamets hã hadäk do wë raty kanejäk hyb n'aa. Tii d' nado äã bad'oo papuuj P'op Hagä Do ky n'aa enooh do hã. Neÿÿm doo me äã baher'oot ta ky n'aa. ¹⁴Ta bag gabarëeh do Isaraéw buuj rahapëë né paawä ti noo gó, dooh m' rah'yy kadawuung bä, dooh m' rah'yy gah'ood bä. Da hë na-ãäj nä, pooj jé P'op Hagä Do ky n'aa enooh do kerih do kaner'oot bä, kajesuu do hadoo sa h'yyb, rah'yy kanadaw'uuh hyb n'aa ta hã. Jããm hë Kristo hã ji h'yy kae bä takado hõm ta ti ji h'yy kajesuu do hadoo do paah. ¹⁵Da hë na-ãäj nä, Mosees ky n'aa jaw'yyk do kerih do kaner'oot bä, kajesuu do hadoo sa h'yyb. ¹⁶Tii d' tado né paawä, Tak'ëp Hyb N'aa Jawyk Do wë ji h'yy kawareem bä, ta hã ji h'yy ka'eeh hyb n'aa kä, kado hõm kãn ti ji h'yy kajesuu doo. ¹⁷Ta ti tawén hadoo, P'op Hagä Do Sahee né hë ti ta ti Tak'ëp Hyb N'aa Jawyk Doo. Tak'ëp Hyb N'aa Jawyk Do Sahee bawät bä, baad däg ji bawäd däk tan'oo bä. Dooh ji hewad wät péh. ¹⁸Ti hyb n'aa ëër kä, ta hã h'yy ka'eeh doo, ër mamets jesuu n'aa tamah doo me ër hã takametä kãn Tak'ëp Hyb N'aa Jawyk Do hanaa ta hetsó gabarëeh doo. Ër kawareem had'yyt hë, Tak'ëp Hyb N'aa Jawyk Do hadoo ër bahadoo do kahüüm had'yyt hyb n'aa. Kahüüm had'yyt hë ta bag gabarëeh do hadoo ër hã kametëeh doo,

Tak'ëp Hyb N'aa Jawyk Doo, P'op Hagä Do Sahee hadoo do hã hana doo.^h

4 Ti hyb n'aa kä, äã wë P'op Hagä Do ky enyym do hyb n'aa papuuj taky n'aa enooh do rod n'aa äã bahadoo tanoo do hyb n'aa, dooh äã h'yy gejë hõm bã. ²Dooh né hë äã h'yy gejë hõm bã. Äã eréd hõm kejën doo gó moo kaheb'oooh doo, nu meby n'aa näng doo. Dooh äã wad'ii bã ta wób. Dooh äã ehÿÿd bã P'op Hagä Do kyy kerih doo. Baad ub äã baher'oot baad hadoo do ky n'aa. Baad äã babok P'op Hagä Do matym gó sahõnh hë sa hã kametä däk. Jé hyb n'aa matakëë do hapäh tii. ³Baad né paawä äã baher'oot panyyg hanäm doo, dooh tagah'ood nä bã ta wób sa hã, jããm hë taganahoot banesaa hënh hah'üüm do sa hã. ⁴Bag hadoo Kristo tak'ëp kabaj'aa do ky n'aa. P'op Hagä Do hadoo né hë ti Kristo. Ti hadoo né hë Nesaa Do Yb, badäk hahÿÿ hã P'op Hagä Do hã h'yy kana'eeh do hã mejüü doo, tan'oo bã panyyg hanäm do hã rah'yy kanadaw'uuh hyb n'aa. Tii d' Nesaa Do Yb wén d'oo, ta ti bag hadoo do ranahapäh hyb n'aa. ⁵Dooh äã ky n'aa tado bã ti äã maher'ood hõm doo. Jesus Kristo, Tak'ëp Hyb N'aa Jawyk Doo, ji Wahë N'aa, ti äã ky n'aa her'ood hõm doo. Äã tii, bë karom hadoo Jesus hyb n'aa. ⁶P'op Hagä Doo, “Ganä ta bag badagyp do mahang” her'oot do paah,ⁱ ti né hë ti ër h'yyb gó ta bag ganyyh hanoo doo, P'op Hagä Do hejój hã, tak'ëp ta kabaj'aa do hã, ta bag gabarëeh do Kristo mamets hã kametëeh do hã äã h'yy kadaw'uuh hyb n'aa.

⁷Ta ti tak'ëp hanäm doo, ta bag gabarëeh doo, ta hejój na-ääj hë, kan'oo däk äã hã, äã nahejoonh do hã. Tii d' tawén d'oo, P'op Hagä Do hanaa ji bahapäh hyb n'aa sahõnh hë bahãnh hadoo do hejój, äã hanaa nado. ⁸Nesaa do jé pad'yyt hë äã ahob né paawä, äã medëp né hë. Dooh né paawä äã ad'oo péh, dooh äã h'yy gejë hõm bã. ⁹Äã rano n'aa mahes'oo né paawä, dooh P'op Hagä Do äã teréd bã. Äã majiï äã radewäts né paawä tũü, dooh rahaja bã äã h'yy gejë hõm bã ran'oo bã. ¹⁰Äã ahoop do hyb n'aa, äã kata däg had'yyt hë Jesus dajëp do hã, Jesus edëp do kametä däk hyb n'aa äã hã. ¹¹Hahÿ hyb n'aa ÿ wén her'oot tii: Äã hedëp doo, dajëb gó

^h **3.18** Hahÿ da na-ääj hë tahajaa ji erii bã tæg nad'ëed is do 18: Ti hyb n'aa sahõnh hë ëer, ta hã h'yy ka'eeh doo, japow gó ji heg'ääs do hadoo ër baheg'ääs Tak'ëp Hyb N'aa Jawyk Do hanaa ta hetsó gabarëeh doo. Èr mamets jesuu n'aa tamah doo me ër heg'ääs. Èr hegäã nuuj jé, ër kawareem had'yyt hë Tak'ëp Hyb N'aa Jawyk Do hadoo ër bahadoo do kahüüm had'yyt hyb n'aa. Tak'ëp Hyb N'aa Jawyk Doo, P'op Hagä Do Sahee hadoo doo, ti né hë ta ti hanoo do ër hã.

ⁱ **4.6** Badäk hahÿ tapahuunh noo gó tii d' ta kyyh.

had'yyt āā babok Jesus hyb n'aa, Jesus edëp do āā hā kametä dāk hyb n'aa, āā nahejooj is do hā. ¹²Ti hyb n'aa dajëb gó āā babok, edëb heh'äät do bë gadoo hyb n'aa.

¹³Hahÿÿ da takerii dāk P'op Hagä Do kyy kerih doo gó: “ÿ h'yy kae dāk, ti hyb n'aa ÿ wén her'ood wät”,^j näng kerih do hā. Ti hadoo āā na-āāj hē. Āā wén her'oot Jesus ky n'aa, āā h'yy kae dāk do hyb n'aa. ¹⁴Āā her'oot ta tii, hahÿÿ d' āā bahapäh do hyb n'aa: Jesus, Tak'ëp Hyb N'aa Jawyk Do ganä wät hanoo doo, āā na-āāj hē da genä bok tan'oo bä da Jesus nemuun. Tii b' bë sii hē āā tamahūūm da ta wë, ta matym gó ër tametëeh hyb n'aa kä. ¹⁵Bë hyb n'aa né hē sahõnh hē ta ti ÿ ahoop doo, baad tabahadoo hyb n'aa bë hā. Tii d' tawén d'oo P'op Hagä Do ji hā taky ennym do ky n'aa gad'oo do kah'ūūm hyb n'aa. Tii bä kä, hajök tseb'ee da P'op Hagä Do wë, P'op Hagä Do j'aa ketsëe dāk hyb n'aa kä.

¹⁶Ti hyb n'aa dooh āā h'yy gejë hõm bä. Āā hub kahäj jëe né paawä, āā h'yyb papuuj hado däg had'yyt hē. ¹⁷Āā wén h'yy ganejë hõm, kanahën d'os hē hadoo do ër ahoop do nayyw hē tabës do ër hā tabanoo tak'ëp baad hadoo do nahänh doo. Dooch its ti ji ahoop doo, tak'ëp baad hadoo do matym n'aa. ¹⁸Ti hyb n'aa dooh āā h'yyb padäg bä ji hapäh do hā.^k Ji nahapäh do hā āā h'yyb padëek.^l Ji hapäh do ahänh. Ji nahapäh doo, dooh tahëej bä. Tawäd had'yyt hē.

Ër hub papuuj ky n'aa hahÿÿh

5 Ër hub badäk hahÿÿ bä hanäng do dajëp bä, ti anyy dāk ër hapäh, hÿ pong jé ër hub papuuj gawanatsik do P'op Hagä Do mo haj'aa. Ajyy mo haj'aa nado tii kä. ²Ti nuuj jé, badäk hahÿÿ bä ër babok nä bä, hejooch ër hā. Tak'ëp ër karën hÿ pong jé hub n'aa ër gadoo, ër kah'ÿÿt ³ër hub papuuj däg hyb n'aa. Tii bä, dooh da ër hub tamaa bä. ⁴Da hē, ta säg gó ër babok nä bä ër ahoop nä. Hejooch ër hā. Nyy d' ÿ hanäng péh? Ër karën ër dejëp ër hub tamah hyb n'aa, ÿ hanäng pé g'eeh? Dooch. Hÿ pong jé hub n'aa ër karën paawä nayyw hē ër gadoo, dahej'ëep do kawareem dāk

^j **4.13** Saaw-Mo 116.10 hā takerii dāk tii. Hajõng nesaa do Saaw-Mo 116 erii wät do paa ahoop paah. Ti hadoo né hē, P'op Hagä Do hā tah'yy ka'eeh do hyb n'aa, P'op Hagä Do hā taky n'aa etsëe dajëb mahänh tabedëp hyb n'aa. Ti hadoo Paw-Ro bad'oo na-āāj hē. Hajõng nesaa do tabaahoop. Ti hado né paawä, P'op Hagä Do hā tah'yy ka'eeh do hyb n'aa, dooh Paw-Ro eréd bä Jesus ky n'aa hanäm do tahe'oot doo, tama metëek doo.

^k **4.18** Dooch badäk hahÿÿ hā ji ahoop do hā rah'yyb padäg bä, Paw-Ro hanäng péh.

^l **4.18** Hÿ pong jé ji gadoo do hā rah'yyb padëek, Paw-Ro hanäng péh.

hyb n'aa nadajëp do hã kä, edëb had'yyt do hã kä.^m 5P'op Hagä Do né hë tii, edëb had'yyt do ër gadoo hyb n'aa ër tawén pehuuj wät doo. Ti nuuj jé tan'oo däk dó ër h'yyp gó ta Sahee, ta jawén hÿ pong jé ër gadoo do metëeh doo.

6Ti hyb n'aa baad ër gahëen had'yyt hë ër pooj jé ër gadoo do pan'aa. Da hë ër babok nä bä, dooh Tak'ëp Hyb N'aa Jawyk Do pa ër aboo nä bä ër hapäh. 7Badäk hahÿÿ bä ër babok nä bä, ta hã ër h'yy kae had'yyt hë, dooh né paawä ji hapëë nä bä ji matym me ji hã taky däng doo. 8Tsebee gó ër gahëen né hë ër gadoo do pan'aa. Tak'ëp ër karën paawä ër berét badäk hahÿÿ bä ër babong nä doo, Tak'ëp Hyb N'aa Jawyk Do pa had'yyt ër baboo däk hyb n'aa kä. 9Ti hyb n'aa tagen'aak do hã tak'ëp ër h'yyp padëëk, tatsebé hyb n'aa ër wë kä. Ta tii hã ër h'yyp padëëk, badäk hahÿÿ bä ër hub n'aa gó ër babok nä bä, badäk hahÿÿ bä ër hub n'aa ër beréd hõm bä na-ãäj hë né hë. 10Tagen'aak do hã ër wén h'yyp padäg had'yyt hë, ër sahõnh hë ër da kametä däk do hyb n'aa Kristo matym gó ër taky n'aa etyy hyb n'aa, ji gadoo hyb n'aa badäk hahÿÿ hã ër babok nä bä baad hadoo do ji moo wäd wät do mabaj, baad nadoo do ji moo wäd wät do sãm na-ãäj hë.

Ji P'op Hagä Do gadoo do ky n'aa hahÿÿh

11Ji weh'ëeh né hë Tak'ëp Hyb N'aa Jawyk Do baad äã bahapäh, ti né hë ti ji taky n'aa etyy do hyb n'aa. Ti hyb n'aa äã h'yy kah'üüm ta wób hã äã her'oot doo, Jesus hã rah'yy ka'eeh hyb n'aa. Baad äã P'op Hagä Do bahapäh, dooh ÿ ky kenäw bä. T'öp madäk doo me, baad hadoo doo me ÿ bawät P'op Hagä Do hapäh. Bë na-ãäj né hë bë hapäh tahyb n'aa péh. 12Dooch äã daaj hë äã j'aa ketsëë bä p'aa hënh bë matym gó. Dooch. Jääm hë äã anoo bë hã ta tyw n'aa, äã hyb n'aa bë h'yy kasab'ee hyb n'aa, bë bahajaa hyb n'aa bë ky gadoo j'ooj hë madäk do hã j'aa kehets'ëë doo, ma matëg oow, t'öp ji h'yyp gó hanäng do hyb n'aa napeet doo. 13Äã h'yyp mera ta wób redoo bä, na raher'ood. P'op Hagä Do hyb n'aa tii bä ti äã h'yyp mera doo. Baad tado bä äã h'yyp, bë hyb n'aa né tii, baad tabahadoo hyb n'aa bë hã. 14Kristo kamahän do äã tah'yyp mahüüm. Hahÿÿ da baad äã bahapäh: Sét hë dajëp

^m 5.4 Hahÿÿ d' Paw-Ro hanäng péh: Taw'ääts hë paawä ji hã, badäk hahÿÿ bä ji bawät nä bä Jesus matëeh. Tii d' tado bä, ji hub dahej'ëep do kawareem däk nadajëp do hã.

sahõnh hē sa hyb n'aa. Ti hyb n'aa sahõnh hē dejëp do hadoo.¹⁵ Sahõnh hē sa hyb n'aa tawén dajëp, papuuj ji bawät do gadoo doo, sa hã hē ranaboo bong hyb n'aa. Kristo hã, sa hyb n'aa dajëp do hã, sa hyb n'aa ganä wät do hã kä rababoo däg kän hyb n'aa kä. ¹⁶Ti hyb n'aa, hÿÿ kä dooh äã da hadoo do äã hyb n'aa hüüm wäd bä P'op Hagä Do nahapäh do sa da hadoo do rahyb n'aa h'üüm doo da. P'op Hagä Do nahapäh doo da né paawä Kristo ÿ hyb n'aa hüüm wät paah,^o dooh tii da ÿ adoo wäd bä. ¹⁷Kristo hã h'yy kata däk doo, papuuj däg tii kä. Gawatsig hõm ji h'yyb säg hejój. Papuuj däg ji hÿÿ kä. ¹⁸P'op Hagä Do hanaa sahõnh hē ta tii. Ti né hē ti P'op Hagä Doo, Kristo hyb n'aa p'aa hēnh ta wē er tagadoo doo, ta majiï er nahado wät hyb n'aa, ta najiis er bahado däk hyb n'aa kä. P'op Hagä Do anoo äã hã, ta wób äã maher'oot hyb n'aa ta ti ky n'aa hanäm doo. ¹⁹Hahÿ ti ta ky n'aa: Kristo hyb n'aa P'op Hagä Do gadoo ta wē badäk hahÿÿ hã habong doo, ta majiï ranado bong hyb n'aa, ta najiis rabahado padëëk hyb n'aa kä. Dooh tetsén wäd bä sa hã nesaa do ramoo bok doo. Tamabaan hõm kän. Ti tamejüü äã hã, ji tagadoo do ky n'aa äã baher'ood hõm hyb n'aa kä ta wób sa hã. ²⁰Ti hyb n'aa Kristo rod n'aa ääh. Ta mejüü do ääh. Äã her'oot do hã P'op Hagä Do bë tamaher'oot. Kristo ky gabuuj gó tak'ëp äã betsëë bë hã, bë banoo hyb n'aa bë P'op Hagä Do h'yyb wareem ta wē, ta najiis bë bahado padëëk hyb n'aa kä. ²¹Kristo, tabad'op hē nesaa do moo nawät doo, nesaa do er moo bok do sãm tabahado däk P'op Hagä Do an'oo bä, Kristo hyb n'aa baad had'op er bahado padëëk hyb n'aa kä P'op Hagä Do matym gó.

6 Ti hyb n'aa kä, P'op Hagä Do masa n'aa äã bahadoo do hyb n'aa, tak'ëp äã betsëë bë hã, daap hē bë ganadoo hyb n'aa P'op Hagä Do anoo doo, bë hã taky ennym doo. ²Tii da ÿ wén her'oot, hahÿÿ da ta kyy kerih doo gó P'op Hagä Do her'oot do hyb n'aa:

“Öm ÿ gadoo do noo gó kajaa bä kä,
ÿ maa newë wät maky n'aa etsëë doo.

ⁿ **5.14** Dooh ji h'yy gagog hõm do ky n'aa tado bä hahÿÿ hã Paw-Ro her'oot doo. Dooh ji hub dajëp do ky n'aa tado bä. Hahÿÿ d' tahanäng pé tii: Er hyb n'aa Kristo dajëp nesaa do er moo bok do sãm. Hÿÿ kä, Kristo hã h'yy ka'eeh doo, ta hã rah'yy kata däk do hyb n'aa, radejëp do hadoo nesaa do hã. Ti hyb n'aa nesaa do ji h'yyb säg karën do ji ky nadahé wät. P'op Hagä Do Sahee ji hã metëeh do ji ky dahé kän hÿÿ kä. Dooh ji karën doo da ji awäd wäd bä tahanäng pé tii, tég nad'ëed is do 15 hã kerii däk doo da.

^o **5.16** Ta hã Jesus kasee do pooj jé, a'jyy ub Jesus, Paw-Ro ed'oo.

Õm ÿ bed'ëep do noo gó kajaa bä kä,
 ÿ masaa wät õm.^p

Bë maa newë baad ub! Da hë né kä ji tagadoo do noo gó kä. Da hë né kä ji tabed'ëep do noo gó kä.

Baad ub Paw-Ro rababok hejooñh do rahob né paawä ky n'aa hahÿÿh

³Dooh äã moo bong pé ta wób h'yyb hewaat péh, P'op Hagä Do ky n'aa hanäm do äã maher'oot do raky n'aa narejää hyb n'aa.

⁴P'op Hagä Do karom äã bahadoo do hyb n'aa, sahõñh hë sa hä äã metëeh nyy da tak'ëp h'yyb jawyk doo me baad ub äã babok, baad nadoo do äã ahob bä, äã wë badoh do äã ahob bä, dooh äã ad'oo pé né paawä, ⁵äã rahewyh bä, äã radewäts bë bä, hajök do rakamajë bä äã hä, tak'ëp äã moo bok do hä, ty jawyk do äã ahob bä, äã basaah bä na-ääj né hë. ⁶Dooh äã moo boo bä nu meby n'aa näng doo. Kristo ky n'aa äã hapäh. Äã h'yy kanejäg. Ta wób wë äã ky en'yyim. P'op Hagä Do Sahee äã tah'yyb mahüüm. Baad ub, t'öp madäk doo me äã kamahän ta wób.

⁷Baad hadoo do äã her'oot. P'op Hagä Do hejój gó äã babok. P'op Hagä Do karën doo da ji bawät doo, äã kuman hadoo. Tii me äã kamej'oonh. Tii me äã mesoo. ⁸P'op Hagä Do wë äã moo bok äã raweh'ëeh bä, äã rawanehëe bä na-ääj hë. P'op Hagä Do wë äã moo bok baad rahe'ood bä äã ky n'aa, äã raky n'aa rejä bä na-ääj né hë. Ta wób mä äã wedii, ta wób sa hä. Ti hadoo né hë baad hadoo do ky n'aa äã her'oot. ⁹Äã ky n'aa netsä né paawä ta wób sa hä, P'op Hagä Do baad äã tabahapäh. Dajëb gó äã baboo né paawä, äã edëp näh. Äã rahewyh né paawä, dooh äã dejëb bä. ¹⁰H'yy katón n'aa näng né paawä, äã tsebee had'yyt hë. Äã kasuud its né paawä, hajök do hä äã banoo hajõng baad hadoo doo.^q Dooh né paawä äã wë hanäng péh, ti anyy had'yyt hë P'op Hagä Do karën do äã wë.

¹¹Baad bë äã maher'oot najis haa, Korín buuj. Dooh äã jejën bä äã h'yyb. Tak'ëp bë äã kamahän né hë. ¹²Äã nado bë hä kasaë doo. Bë ti kasaë äã hä. ¹³Ji taah ji maher'oot doo da né hë ÿ maher'oot bëeh: Ý karën paawä bë ÿ kamahän doo da bë kamahän ÿÿh.

^p 6.2 Isajas 49.8

^q 6.10 Dooh dajëer tado bä ti ta wób sa hä ranoo doo. Jesus ky n'aa hanäm do Paw-Ro maher'oot do ragado bä, h'yyb n'yyim doo, h'yyb tym nadajëp do P'op Hagä Do pa ragadoo. Ti ky n'aa né tii.

**Dooh séd hã ji h'yyb hedo bã Jesus hã h'yy
kana'eeh do sa hã ky n'aa hahÿÿh**

¹⁴Taw'ããts hẽ bẽ kamekuuj manãh, taw'ããts hẽ séd hã bẽ h'yyb hedo manã Jesus hã h'yy kana'eeh do sa hã. Tii d' ÿ wén her'oot, dooh séd gó tanu dëë bã baad had'op do ji moo wät doo, P'op Hagä Do mejüü do ji ky nadaheeh do hã. Dooh tanu dëë bã ta bag gadagyp do hã. ¹⁵Séd h'yyb nahedoo Kristo, Nesaa Do Yb daheeh. Séd h'yyb nahedoo Jesus hã h'yy ka'eeh doo, Jesus hã h'yy kana'eeh do daheeh. ¹⁶Dooh tahaja bã séd hã rah'yyb hedo bã P'op Hagä Do tób n'aa, kabarii daheeh. Èr tii, P'op Hagä Do hedëb had'yyt do tób n'aa hadoo. Ta daaj né hẽ P'op Hagä Do her'oot ta tii. Hahÿÿ da ta kyy kerih doo gó taky däng ji hã:

“Sa h'yyb gó da ÿ bawät, sa mahang da ÿ bawät.

ÿ da P'op Hagä Do rah'yy kaha'eeh doo. Karapé haa d' tii.”^r

0, ¹⁷“Ti hyb n'aa, bẽ anã da hã ÿ h'yy kana'eeh do sa mahang naa. Taw'ããts hẽ da tsyt hẽ bẽ babok”, näng mä Tak'ëp Hyb N'aa Jawyk Do kyyh.

“Baad bẽ kanã baad nadoo do mahãnh, tii bã da bẽ ÿ gadoo”,^s näng mäh.

0, ¹⁸“Tii da bẽ adoo bã, bẽ yb da ÿ tii bã.

Bẽ da tah haa, bẽ da tok haa, näng mä Tak'ëp Hyb N'aa Jawyk Doo, Sahõnh Hẽ Haj'ap Do kyyh, ji taky n'aa enooh doo.”^t

7 Najis haa, èr hã ta ti taky n'aa enooh do hyb n'aa, taw'ããts hẽ èr enyyw hõm èr hã rejãã doo, èr h'yyb rejãã do na-ããj hẽ. P'op Hagä Do èr weh'ëeh do hyb n'aa, taw'ããts hẽ èr kan'oo däg had'yyt hẽ ta hã, tsyt hẽ, ta wẽ had'yyt èr babok hyb n'aa kã.

Paw-Ro tsebé do ky n'aa hahÿÿh

²Taw'ããts hẽ paawã baad bẽ kamahãnh ããh! Dooh baad nadoo do ãã moo boo bã sa hã. Dooh ãã rejã bã sa hã. Dooh ãã wad'ii bã sa hã. ³Bẽ ÿ ky n'aa etyy do hyb n'aa nado ti ÿ wén erih. ÿ her'ood däk né paa baad bẽ ãã kamahãnh. Bẽ ãã kamahãnh had'yyt hẽ èr bedëp bã, èr dejëb bã na-ããj hẽ. ⁴ÿ hapäh bẽ gadoo ÿ her'oot doo. Ti hyb n'aa neÿÿm doo me bẽ ÿ maher'oot. Bẽ hyb n'aa ÿ kasab'ee.

^r 6.16 Rewitikos 26.12, Jeremij 32.38, Esekijew 37.27

^s 6.17 Isajas 52.11, Esekijew 20.34, 41

^t 6.18 2 Samuëw 7.8, 14

Tak'ëp ÿ h'yyb nyw däg kãn, ÿ tsebee kãn. Sahõnh hẽ baad nadoo do ãã ahob né paawä, tak'ëp ÿ h'yy gadajang.

⁵Masedonija häj n'aa bä ãã kaja hõm noo gó, dooh kameh'ããk do ãã hã. Jé pad'yyt naa ji h'yyb panas'ëeh do kejäk ãã wẽ. ãã wẽ ta wób rah'yy kawereem. ãã h'yyb gó h'yy katón badäk. ⁶Ti hadoo né hẽ, P'op Hagä Doo, h'yy ketón do h'yyb en'yyim doo, ãã tah'yyb en'yyim Tiit kajaa do hã, bë wẽ tabewäd nä do jawén paa bä. ⁷Tiit kajaa do had'yyt nado ÿ tah'yyb en'yyim doo. ÿ wén h'yy gadajang, ÿ wén h'yyb nyw däk na-ããj hẽ, Tiit mä bë h'yyb en'yyim, tanooh. Tak'ëp mä ÿ bë hyb n'aa esee, tanooh. Tak'ëp mä bë h'yy ketón bong baad nadoo do bë mahang hawäd wät do hyb n'aa. Tak'ëp mä bë h'yyb tseb'ee wẽ ÿÿ, näng ta kyyh. Ti hyb n'aa kä, tak'ëp ÿ wén tsebee kãn hÿÿ kä.

⁸Pooj jé bë ÿ ma erih do hã bë hyb n'aa tón boo né paawä, dooh ÿ t'yyd kamehĩn bã tii da bë ÿ ma erih do hã. Pooj jé dó ÿ t'yyd kamehĩn dó ÿ erih do bë hyb n'aa tón bong tan'oo bã ÿ bahapäh bã, banadawäd né paawä bë h'yy ket'oon doo. ⁹Tii d' tahado né paawä, ÿ h'yy gadajaa kãn hÿÿ kä. Bë hyb n'aa tón do hyb n'aa nado ÿ wén h'yy gadajaa kãn. ÿ wén h'yy gadajang, bë hyb n'aa tón do hyb n'aa bë t'yyd kamehĩn bong baad nadoo do hã. Bë hyb n'aa tón do P'op Hagä Do gadoo. Ti hyb n'aa kä, dooh nesaa pé ãã moo boo bã bë hã bë ÿ ma erih doo me. ¹⁰Ji h'yy katón do P'op Hagä Do gadoo doo, ji h'yy kawareem baad hadoo do wẽ tan'oo bã. Baad hadoo do wẽ ji h'yy kawareem doo, ji h'yyb tym tabed'ëep tan'oo bã kä. Ti hyb n'aa dooh ji jesyg bã ta ti hedoo do ji h'yy katón doo. Ji gadoo né hẽ. Badäk hahÿÿ hã habong do P'op Hagä Do hã h'yy kana'eeh do rah'yy katón doo, ji h'yyb tym dajëp tan'oo bã.^u ¹¹Bë hegãã bë h'yy ket'oon do bë hã P'op Hagä Do anoo do tan'oo bã bë hã: Bë h'yy katón do hyb n'aa, nayyw hẽ bë karën nesaa do bë ado hõm bë mahãnh, dooh bë karën bã nesaa do moo bok do h'yyb hataa bë do bã, tak'ëp bë ganen'aak nesaa do bë mahang hawäd wät doo. Bë h'yy katón do hyb n'aa bë h'yyb eÿÿm bong, tak'ëp bë karën ÿ bë bahapäh, tak'ëp bë h'yy kahasaãb baad hadoo do bë moo bok hyb n'aa, nayyw hẽ bë karën nesaa do moo wät do ky n'aa kety däk. Sahõnh hẽ ta tii me bë metä wät, bë h'yyb haj'aa hẽ nado wäd nesaa do bë mahang hawäd wät doo.

^u **7.10** Tii d' tawén hadoo, sa h'yyb kawanareem do hyb n'aa. Ta ti hedoo do ji h'yy katón doo, dooh tan'oo bã ji t'yyd kamehĩn hyb n'aa nesaa do ji moo wäd wät do hã.

¹²Pooj jé bē ŷ ma erii wät doo, pooj jé bē gadoo doo, aj'yy nesaa do moo wät do had'yyt hyb n'aa nado ŷ wén erii wät. Ta ti aj'yy h'yyb rejā dāk do hyb n'aa had'yyt nado hyb n'aa na-āāj hē. Ta ti bē ŷ wén ma erii wät paah, bē h'yy kadaw'uuh hyb n'aa, bē h'yyb baad hadoo do bē metēeh hyb n'aa kā āā wē P'op Hagä Do matym gó. ¹³Ti hyb n'aa dooh āā h'yy ketón boo bā. Āā h'yyb tseb'ee.

Ŷŷ. Dooh āā h'yy ketón boo bā. Āā h'yyb nyyw padēek né hē. Tak'ēp āā tsebee na-āāj hē tak'ēp Tiit h'yy gadajaa kán āā bahapäh do hyb n'aa. Tiit wén h'yy gadajang, bē sahōnh hē bē h'yyb en'yyim do hyb n'aa ta hā. ¹⁴Bē ŷ j'aa etsē paa Tiit hā. Ŷ her'oot doo da né hē bē ky n'aa, ti né hē bē metēeh Tiit hā. Dooh ŷ bē nu meby bā. Te hub né hē sahōnh hē bē ŷ maher'ood wät doo. Bē hyb n'aa ŷ j'aa etsē doo, te hub né hē na-āāj hē kametä dāk hŷŷ kā. ¹⁵Ta bahānh Tiit bē takamahān kán tahyb n'aa newē bā nyy da baad bē ky daheeh ta kyyh, baad bē gadoo bē mahang, bē h'yyb eŷŷim doo gó bē weh'ēeh ta hā. ¹⁶Ŷ h'yy gadajang, bē hā baad ji hajaa ji h'yyb eh hyb n'aa.

Ji etsēeh do ky n'aa hahŷŷh

8 Hŷŷ kā wakān haa hedoo doo, āā karēn bē āā maher'oot nyy da Kristo hā h'yy ka'eeh do Masedonija hāj n'aa bā habong do rabad'oo P'op Hagä Do ky enyym do sa h'yyb gó hawät do an'oo bā. ²Tak'ēp nesaa do rahob né paawā, tak'ēp ratsebé. Tak'ēp ratsebé do hyb n'aa tak'ēp ramasa sa wē hanäng doo me. Tak'ēp rabetsēeh, kasuud its né paawā. ³Baad bē ŷ maher'oot sa ky n'aa. Rahajaa do pénh né hē rabanoo. Ti bahānh rabanoo, rahajaa do bahānh. Sa h'yyb gó naa, sa daaj hē né hē ti tak'ēp rabetsēeh. ⁴Rets'ēē had'yyt hē āā hā, āā banoo hyb n'aa ramasa hyb n'aa Kristo karapee Judah hāj n'aa bā habong doo. Baad ub sa hā ti ji masa doo. ⁵Āā hyb n'aa newēē do bahānh rabad'oo. Sa daaj hē rakan'oo däg pooj jé Tak'ēp Hyb N'aa Jawyk Do karēn do ramoo bok hyb n'aa, āā karēn do na-āāj hē. P'op Hagä Do karēn doo da né hē ji hā, tii da rabad'oo. ⁶Ti hyb n'aa kā tak'ēp āā betseē Tiit, pooj jé du doo do bē tah'yyb mahūūm dajēēr masa n'aa bē ataa do hā, bē tah'yyb mahūūm p'aa hēnh, ta ti bē masa do dajēēr n'aa takaja dāk hyb n'aa. ⁷Tak'ēp bē gado dāk baad hadoo doo: Tak'ēp bē h'yy ka'eeh. Tak'ēp bē bahajaa bē baher'oot P'op Hagä Do ky n'aa. Baad bē bahapäh ji hā P'op Hagä Do karēn doo. Tak'ēp bē h'yy kahās'āāp baad hadoo do bē moo bok hyb n'aa. Tak'ēp āā bē kamahān.

Ti hyb n'aa, ȳ karēn paawä tak'ëp na-ããj hē bē banoo ta wób ji masa doo. Taw'ãäts hē ti ji hỹj hedoo do ji masa doo. ⁸ Doo h bē ȳ mejō bā ta wób bē masa hyb n'aa. Jãã hē ȳ karēn bē ky n'aa napäh nyy da sa h'yyb hedoo doo me ta wób ramasa sa da hadoo doo, bē na-ããj hē baad bē kamahän bē da hadoo do bē metēeh hyb n'aa. ⁹ Taw'ãäts hē paawä ta wób bē masaa, bē hapäh do hyb n'aa nyy da er Wahë N'aa Jesus Kristo bad'oo do paah. Taky enny do hyb n'aa ji wē, sahõnh hē ta wē anyy wäd né paawä, kasuud is tabahado däk bē hyb n'aa, tak'ëp baad hadoo do bē wē tabanyy däk hyb n'aa kã P'op Hagä Do matym gó.^v

¹⁰⁻¹¹ Ta baab tabëej hõm do hã, bē né ti jããm pooj jé dajëer hat'aa do du d'oo doo. Bē né ti pooj jé kar'ëen mas'aa doo. Ti hyb n'aa, hã ȳy taw'ãäts hē tsebé doo gó bē du doo doo da né hē bē bahajaa hỹj kã bē du doo do paah. Taw'ãäts hē bē hajaa do bē anoo. ¹² Bē h'yyb n'oo bā, P'op Hagä Do gadoo da bē hajaa do bē anoo doo. Doo h P'op Hagä Do gahëen bā bē hã bē wē badoh doo. ¹³ Doo h ãã karēn bā ta wób hã bē banoo do hyb n'aa, bēë kã ti hahoop badoh doo. ãã karēn paawä séd demuun tabanäng sahõnh hē sa wē. ¹⁴ Da hē bē wē hanäng do masa sa hã. Ta jawén bē wē tananyy bā, bē d' ramasaa kãn ta mabaj. Tii bā kã, séd demuun tabanäng sahõnh hē sa wē. ¹⁵ Tii d' tabaher'oot P'op Hagä Do kyy kerih do hã:

“Doo h mad'aak pé hajõng do hat'aa do sa wē.

Kanahën d'os hē hat'aa doo, doo h badoh pé sa wē ënh.”^w

¹⁶ P'op Hagä Do ȳ j'aa etsë Tiit hã tabanoo do hyb n'aa bē tahyb n'aa esee bē ȳ hyb n'aa esee do hadoo da. ¹⁷ Tiit gadoo ãã etsë do ta hã, bē wē tabahõm hyb n'aa. Tak'ëp tah'yyb hedoo bē wē tabeg'ãäs hyb n'aa. Ta hã ãã eanh do pooj jé, ta daaj hē tahyb n'aa newë däk bē wē tabahõm hyb n'aa. ¹⁸ Tiit sii ãã mejüü da ãã hỹj ky n'aa hadoo do jé pad'yyt hē Jesus hã h'yy ka'eeh do mahang ky n'aa etsëeh doo, Jesus ky n'aa hanäm do hã tamoo wät do hyb n'aa. ¹⁹ Jesus hã h'yy ka'eeh do jé pad'yyt hē kahet'aa do

^v **8.9** Wawëe hē Jesus bewäd hyng do pooj jé, tak'ëp takabaj'aa. Tii bā kã, a'jyy tabahado däk, dajëb kãn ji tabed'ëep hyb n'aa. Tii d' tahanäng pé ti kasuud is do tabahado däk. Taw'ãäts hē ji hyb n'aa newëe nyy da tak'ëp ji Jesus t'yyd mehün, ji na-ããj ji t'yyd mehün hyb n'aa ji da hadoo do.

^w **8.15** Esodo 16.18. Pãw hadoo *Manah* häd näng do P'op Hagä Do mo haj'aa doo, tabanawäng hënh Isaraëw buuj rababok noo gó ky n'aa gó Paw-Ro beh'uum. Ti noo gó kanahën d'os hē *Manah* hat'aa doo, doo h badoh péh. Hajõng hat'aa doo, doo h mad'aak pé sa wē.

rasēew hōm ta ti hỹj ky n'aa hadoo doo, āā tabahada hyb n'aa Jerusarēnh hēnh dajēer kata dāk do āā tajoooh bā kā. Ta ti sa masa n'aa āā tajoooh Tak'ēp Hyb N'aa Jawyk Do āā weh'ēeh hyb n'aa, baad āā karēn āā masa er wakāān Jesus hā h'yy ka'eeh doo, āā metēeh hyb n'aa na-āāj né hē.

²⁰Āā hỹj hedoo do āā d' rahada, ta wób daap rah'yy genā mahānh dajēer āā mahūūm do hā. ²¹Baad āā matakēē, baad hadoo do āā moo bok hyb n'aa Tak'ēp Hyb N'aa Jawyk Do matym gó, ajyy sa matym gó na-āāj hē. ²²Tiit sa sii āā mejūū nā āā hỹj seeh. Hajōō nuu me āā mety dāk tii. Baad tah'yyb hedo had'yyt hē ta wób tamasa hyb n'aa. Baad bē hā tah'yyb ee dāk do hyb n'aa, tak'ēp tah'yyb hedo dāk dajēer bē bataa do hā bē tamasa hyb n'aa. ²³Tiit hā kā, hēp ŷ hata ti bē hā ŷ moo wāt do hā. Jesus hā h'yy ka'eeh do jé pad'yyt hē kahet'aa do mejūū do ta wób, ajyy Tiit had'aa doo. Kristo raweh'ēeh do tii. ²⁴Ti hyb n'aa kā, taw'āāts hē kamahān gó bē gadoo bē wē rakajaa bā kā. Taw'āāts hē bē metēeh ta wób Jesus hā h'yy ka'eeh do jé pad'yyt habong doo, dooh daap hē tado bā bē āā j'aa etsē doo.

9 Doooh hyb n'aa bē ŷ ma erih pé Jesus hā h'yy ka'eeh do Jerusarēnh bā habong do bē masa do ky n'aa hā. ²ŷ hapāh né hē nyy da tak'ēp bē h'yy karēn ta wób bē masa. Bē ŷ j'aa etsē paa Masedonija hāj n'aa bā habong do er wakāān hedoo do sa matym gó. P'ooj ub ta baab tabēej hōm do hā, bēeh, hēej Akaja hād nāng do babuuj,^x bē du doo bē karēn bē masa doo, nāng kēh ŷ sa hā. Hajōk Masedonija hād nāng do hāj n'aa babuuj er wakāān hedoo doo, raky n'aa napāh bā baad bē karēn bē masa ta wób, ti na-āāj hē rah'yyb hedo padēek ramasa hyb n'aa. ³Ta wób bē karēn bē masa ŷ hapēē né paawā, ŷ mejūū Tiit ta hataa daheeh bē wē, bē ramasa hyb n'aa dajēer bē bataa do hā, ta ti hā bē ŷ j'aa etsē do paa daap tanadoo hyb n'aa, ŷ kajaa do pooj jé bē h'yyb bē matakā dāk hyb n'aa. ⁴Er hỹj hedoo do wób, Masedonija hāj n'aa buuj, si ŷ rakajaa bā bē wē, ŷ d' nu mebyy wāt da bē nahaja nā bā, dajēer bē nata nā bā, baad bē ky n'aa ŷ her'ood wāt do paa hyb n'aa. Bē na-āāj né da bē nu mebyy bong sa wē, bē nahaja nā bā. ⁵Ti hyb n'aa ŷ hyb n'aa newē dāk, taw'āāts hē ta ti ajyy ŷ mejūū āā pooj jé, bē ramasa hyb n'aa, kamasa do dajēer n'aa bē bataa hyb n'aa, bē ky kajāk do paah. Tii bā, kaja dāk da āā pooj jé. Bē etsēeh do metēē n'aa dāg ti ta tii kā, bē ramejūū do hyb n'aa nado.

^x 9.2 Akaja hāj n'aa bā Korīn panang badāk.

⁶Bê hyb n'aa newë hahÿÿh: Kanahën d'os hê hejoom doo, kanahën d'os hê ta ag tabataa ênh. Hajông hejoom doo, hajông né ta ag tataa.^y ⁷Taw'ääts hê sahõnh hê bëeh, bê banoo bê h'yyb gó bê h'yy kajäk doo. Taw'ääts hê dooh bê an'oo bä bê h'yyb nanoo doo me. Bê ramejüü do hyb n'aa nado bê banoo. Bê daaj hê bê banoo. Ta ti ÿ wén erih, P'op Hagä Do kamahän do hyb n'aa tsebee gó hanoo doo. ⁸P'op Hagä Do hajaa bê hã tabanoo sahõnh hê baad hadoo doo, tabanyy had'yyt hyb n'aa sahõnh hê bê karën doo, tamad'aak hyb n'aa, sa wë bedoh do bê masa hyb n'aa. ⁹Hahÿÿ da P'op Hagä Do kyy kerih do paa hets'ëeh do sa kyy n'aa hã:

“Etsëeh da wë bedoh do sa hã.

Ky enyww had'yyt hê.”^z

¹⁰P'op Hagä Doo, joom jóm hã ta joom tym hanoo doo, ji waa hanoo do na-ääj hê, bê hã da tabanoo hajông bë ma, ta tii me tak'ëp bê masa hyb n'aa wë bedoh do sa hã. ¹¹Hajông hedoo pé da tabanoo bë hã, bê betsëh had'yyt hyb n'aa. P'op Hagä Do raj'aa etsë da, sa hã bë anoo do ää tajooh bä sa wë. ¹²Ta ti bë masa do tamasa da Jesus hã h'yy ka'eeh do Jerusarënh bä habok do sa wë bedoh doo. Tak'ëp P'op Hagä Do ratsebë da, bê masa do an'oo bä da. ¹³P'op Hagä Do hã raj'aa etsë da. P'op Hagä Do rawén j'aa etsë da, baad bê ky daheeh Kristo panyyg hanäm do bê h'yy kaha'eeh bê hanäk doo, bê masa do metëeh do hyb n'aa. P'op Hagä Do raj'aa etsë na-ääj da, sa hã, ta wób sa hã na-ääj hê bë betsëeh do hyb n'aa. ¹⁴Tak'ëp kamahän gó bê da raky n'aa etsëe P'op Hagä Do hã, P'op Hagä Do ky enywm do hyb n'aa bë wë, sa hã bë wén masa. ¹⁵P'op Hagä Do hã ää j'aa etsë ër matym n'aa tak'ëp hanäm do ër hã tanoo do hyb n'aa. Tak'ëp baad ub tii. Ti hyb n'aa dooh ji kyy pé ta kyy n'aa ji her'ood bä.^a

Paw-Ro ky gadoo ta hã ky sëm do ky n'aa hahÿÿh

10 ÿ eÿÿm do m' bê mahang ÿ bawät bä, näk mä ta wób sa kyyh. Dawëë ÿ bawät bä kä, ÿ neÿÿm kä ÿ erih do

^y 9.6 Ji ejoom do ky n'aa gó Paw-Ro maher'oot ji masa do ky n'aa. Taw'ääts hê ji etsëeh. Baad ub P'op Hagä Do banoo hets'ëeh do sa hã.

^z 9.9 Saaw-Mo 112.9

^a 9.15 Jesus né tii, ji matym n'aa tak'ëp hetsooh doo.

hã, nãk sa kyyh, ÿ ranu mer'oot bã. ÿ né hẽ, Paw-Ro, Kristo ji tah'yyb en'yyim do kyy gó, ji hã ky ennyim do kyy gó, ² tak'ëp ÿ h'yy kah'üüm bã hã, p'aa hẽnh bã ÿ bahehẽen bã kã, bã an'oo manã kyyh tak'ëp hadoo doo me ÿ gadoo hyb n'aa ÿ nu mer'oot doo. P'op Hagã Do nahapãh do h'yyb karẽn do jawén habok doo da ãã babok, nãk ãã nu mer'oot do sa kyyh. Kyyh tak'ëp hadoo doo me da ÿ gadoo tii, ÿ h'yyb dãng. ³ Badãk hahÿÿ bã ãã baboo né paawã, dooh ãã kamety bã sa hã badãk hahÿÿ hã habong do P'op Hagã Do nahapãh do rabahed'oo doo da sa majĩ hã. ⁴ ãã kuman ãã kamety doo, dooh badãk hahÿÿ hã habong do kuman tahado bã. Dooh. P'op Hagã Do hejój me ãã gawats'iik sa mejój. ⁵ ãã gawats'iik rahyb n'aa newëë doo, rah'üüm doo, sahõnh hẽ h'yy kasab'ee do hewaata do P'op Hagã Do rabahapãh nanoo doo. Sahõnh hẽ ji hyb n'aa newëë do ãã no n'aa masoo hadoo, ji majĩ ji no n'aa masoo doo da, ãã meduuk ÿ hanãng péh, ji h'yyb ky daheeh hyb n'aa kã Kristo. ⁶ Baad bã ky dahé dãg bã kã, ãã nabuuq gedoo da ky nadah'eeh nã doo.

⁷ Taw'ããts hẽ bã hyb n'aa matakã wyt ta maab hadoo doo!^b H'yy kasab'ee doo gó, “ãã ti Kristo karapee” hanãk doo, taw'ããts hẽ hahÿ rahyb n'aa newëë: ãã na-ããj hẽ Kristo karapee. Dooh ãã bahãnh rado bã. ⁸ Ta bahãnh ÿ h'yy kasabé bã paawã, ta hyb n'aa jaw'yyk do Tak'ëp Hyb N'aa Jawyk Do anoo do hyb n'aa ãã hã, dooh hyb n'aa ÿ nu mebyng péh. Ta hyb n'aa jaw'yyk do ãã hã taban'oo dãk, bã h'yy ka'eeh do kah'üüm ãã anoo hyb n'aa, bã ãã rejãã hyb n'aa nado. ⁹ Bẽ ÿ ma erih doo me, bã ÿ e'ÿÿm do hyb n'aa nado. Tii d' bã hyb n'aa newë manãh. ¹⁰ Hahÿÿ da sa kyyh ÿ ranu mer'oot bã: “Tak'ëp ji tamejũũ. Ky n'aa jaw'yyk doo gó, kejÿÿk doo gó Paw-Ro ji tama erih. Tii bã ji mahang tawãd bã, nahejooq dãg its. Dooh baad her'oot do tado tii”, nãk. ¹¹ Ta tii d' her'oot do taw'ããts hẽ tahyb n'aa newëë hahÿÿh: Dawëë ãã babok bã ãã erih doo da, tii da na-ããj ãã bad'oo bã mahang ãã aboo dãg bã p'aa hẽnh.

¹² Dooh ÿ haja bã “sa da ÿ hado bã” ÿ noo b'ãts, sa hã hẽ j'aa kehets'ëë doo. Dooh ÿ haja b'ãts sa hã hẽ ÿ kamety b'ãts.^c Sa hã hẽ rakamety doo, sa hã hẽ raheg'ããs do ny hadoo do sa bahãnh

^b **10.7** Wyt ta maab hadoo do hã rahyb n'aa matakã bã, tii bã dooh ragado bã paawã ma matëg oow. Tii bã Paw-Ro Jesus mejũũ do heh'ããt ub rahapãh paawã.

^c **10.12** Paw-Ro e'j'es doo gó tabeh'üüm. Tii da tawén edoo, sa hã hẽ raj'aa etsë do hyb n'aa. Paw-Ro bahãnh mã rahyb n'aa jawyk sa nooh.

hadoo doo, h'yy gatamah ti tametëeh. ¹³Ãã hã kã, dooh ta bahãnh ãã kasabé bã. Dooh ãã kasabé bã ãã hã P'op Hagã Do nanoo do hã. Jããm hẽ ãã kasab'ee ãã hã P'op Hagã Do anoo do hã ãã moo bok hyb n'aa. Bẽ panang bã na-ããj hẽ tabanoo ãã moo bok hyb n'aa. ¹⁴Ãã hã P'op Hagã Do anoo do bahãnh nado ãã baboo dãk. ãã tii, pooj jé bẽ wẽ kaj'aa doo, Kristo ky n'aa hanãm do bẽ hã maher'oot doo. ¹⁵Dooh na-ããj hẽ ãã kasabé bã ta wób ramoo bok do hã. Hahỹ ti ãã karën doo: Bẽ h'yy ka'eeh do kahũũm bã kã, ãã karën ãã moo bok do tak'ëp takah'ũũm na-ããj hẽ, ¹⁶panang wób hënh, bẽ panang bahãnh Jesus ky n'aa hanãm do ãã maher'oot hyb n'aa kã, ta wób ranaher'oot nã bã. Dooh ãã karën bã ãã kasabé bã ta wób ramoo bok do hã, sa hã P'op Hagã Do anoo doo hënh. ¹⁷“Jé h'yy kasab'ee doo, taw'ããts hẽ Tak'ëp Hyb N'aa Jawyk Do hã takasab'ee.”^d ¹⁸Ta hã hẽ h'yy kasab'ee do nado ti Tak'ëp Hyb N'aa Jawyk Do gadoo doo. Tak'ëp Hyb N'aa Jawyk Do j'aa etsë doo, ti né ti ta wẽ tagadoo doo.

“Jesus mejũũ do y̆yh” daap hanãk do ky n'aa hahỹy̆h

11 Bẽ badoo dãk doo da y̆ karën paawã bẽ gadoo nã hã h'yy gatamah do her'oot doo da y̆ er'ood bã.^e ²Tak'ëp bẽ y̆ kamahãn do hyb n'aa y̆ karën bẽ gadoo tii. P'op Hagã Do hanaa ji kamahãn doo me né hẽ bẽ y̆ kamahãn. Ti hyb n'aa, dooh y̆ an'oo bã bẽ rawad'ii. Maruus aj'yy manepãh nã do baad hawãt do hadoo bẽeh. Maruus yb hadoo y̆yh. Bẽ y̆ haëej dãk do hadoo sët ub aj'yy hã, Kristo hã, bẽ patug hadoo tabahadoo hyb n'aa da. ³Ti hadoo né hẽ, ky ken'yym doo gó bẽ da rawedii y̆ jeỹym, jããm hẽ sët hã, Kristo hã baad bẽ h'yyb nadãg wãt hyb n'aa, Ewa aw'yy wad'ii wãt do paa hadoo da. ⁴Tii d' y̆ wén her'oot, Jesus ky n'aa seeh, ãã ma met'ëeg wãt do nadoo do raheer'ood bã, ti nayyw hẽ bẽ gadoo. Nayyw hẽ na-ããj hẽ bẽ gadoo sahee seeh, bẽ gado dãk do paa nadoo doo. Nayyw hẽ bẽ gadoo panyyg seeh, bẽ ãã panãk do nadoo doo. ⁵Dooh né hẽ Jesus ky n'aa rod sa bahãnh red'oo do sa yd jé y̆yh. ⁶Dooh né paawã tak'ëp herot do tado y̆yh, hajõng y̆ hajaa do y̆ hapãh doo. Hajõõ nuu me né hẽ y̆ metã wãt ti bẽ hã.

⁷Bẽ sãm noo do hyb n'aa nado y̆ her'oot do P'op Hagã Do ky n'aa bẽ hã. Dooh bẽ y̆ mejõ bã ta sãm bẽ an'oo bã hã y̆y. Daj y̆y hẽ y̆

^d 10.17 Jeremij 9.24

^e 11.1 Dooh Paw-Ro genaag bã ta daaj hẽ tah'yy kasabé bã. Ti hyb n'aa, hãd h'yy gatamah do her'oot doo da y̆ er'ood bã, tawén nãng. Ta daaj hẽ tah'yy kasab'ee, Korin buuj sa hã tametëeh hyb n'aa ma matëg oow rawedii sa hã.

kadaduu ÿ moo wät do hä, bë kawehëë däk hyb n'aa. Nesaa do g'eeh bë hä, tii d' ÿ ad'oo doo? ⁸ Jesus hä h'yy ka'eeh do panang wób hënh habong do hä ÿ daab yyp, sa dajëër ÿ ado hõm hadoo, ÿ ramasa hyb n'aa Jesus ky n'aa bë ÿ maher'oot hyb n'aa. ⁹ Bë mahang ÿ bawät noo gó, wë ÿ tabadoh bä ÿ karën doo, dooh bë hä ÿ daab yb bä. Ër wakãän Jesus hä h'yy ka'eeh do Masedonija häj n'aa bä naa hana do ÿ ranoo ÿ karën doo. Dooh paa ÿ karën bä bë hä ÿ daab yb bä, tanajawyk hyb n'aa bë jó. Hÿ jawén dooh na-ãäj hë bë hä ÿ daab yb bä. ¹⁰ Kristo ky n'aa hanäm do hëp ÿÿ gó tabawät. Ti hyb n'aa, dooh Akaja häj n'aa bä habong pé ÿ ky meduuk péh, ÿ ky däng, bë hä ÿ daab nayyp do hyb n'aa ÿ h'yy kasab'ee do hä. ¹¹ H'ëed hyb n'aa ti ta ti ÿ her'oot? Bë ÿ kamanahän do hyb n'aa g'eeh? Dooh. P'op Hagä Do hapäh bë ÿ kamahän.

¹² ÿ ad'oo do paah, ÿ badoo had'yyt hë da. Dooh da ÿ gado bä ta säm, sa daaj hë Jesus mejüü do rakamaneëenh do ranahajaa hyb n'aa rah'yy kasabé bä ää nemuun ramoo bok rabanäng do hyb n'aa. ¹³ Kristo mejüü do heh'äät nadoo do tii. Bë rawedii ramoo bok do hä. Kristo mejüü do ked'oo do tii. ¹⁴ Dooh ÿ hyb n'aa meuuj bä rabahed'oo do hä. Nesaa Do Yb sii hë tahajaa takawareem bä ääs ta bag gó hawät do ji ed'oo hyb n'aa, ji tawadii hyb n'aa. ¹⁵ Ti hyb n'aa, dooh ÿ hyb n'aa meuuj bä Nesaa Do Yb karapee baad moo bok do rabahed'oo rakeno bä. Ti hedoo do ragadoo da nesaa do ramoo bok do säm.

Nesaa do tahoop do hyb n'aa Paw-Ro kasab'ee do ky n'aa hahÿÿh

¹⁶ ÿ ab'aanh pooj jé ÿ her'ood wät doo: Bë hyb n'aa newë manä ÿ h'yy gatamah doo! Ti hadoo né hë, ÿ h'yy gatamah do bë ed'oo nä bä paawä, taw'ääts hë ÿ bë gadoo h'yy gatamah do bë gadoo doo da, ÿ na-ãäj hë ÿ h'yy kasab'ee hyb n'aa. ¹⁷ Këh ÿÿ, ÿ h'yy kasab'ee doo, Tak'ëp Hyb N'aa Jawyk Do ber'oot doo da nado. H'yy gatamah do ber'oot doo da ÿ baher'oot. ¹⁸ Hajök ma matëg oow bë mahang habong do rah'yy kasab'ee. Badäk hahÿÿ hä habong do rah'yy karën do jawén habok do rabahed'oo doo da rah'yy kasab'ee. Hÿÿ kä, ÿ na-ãäj da ÿ h'yy kasab'ee.^f ¹⁹ Bë ti h'yy genäh bë edoo né paawä, tsebee gó bë gadoo h'yy gatamah doo. Ti hyb n'aa taw'ääts hë bë gadoo na-ãäj hë ÿÿh, ÿ h'yy kasabé bä.

^f 11.18 Tii da Paw-Ro wén d'oo, Korín buuj rah'yy genäh hyb n'aa ma matëg oow sa hä.

²⁰ Bě gadoo tak'ëp bë hã mejũũ doo, sa karom hadoo bë ran'oo bã. Bě gadoo bë dajëer hã daab 'yyp doo, bë wad'ii doo, bë bahãnh nu gapad'ëek kar'ëen doo, bë rejãã doo, bë ratapa ewyyh doo. ²¹ Ý hãd nu mebyys ý nahaj'as do hyb n'aa bë hã ý moo wãd bã ta tii da bë hã ramoo bok doo.^g

Ãã kanahën its né paawã ta tii hã, ta ti neỹỹm doo me rap'ãã kasab'ee doo, ý na-ããj hë ý hajaa neỹỹm doo me ý p'ãã kasabé bã. H'yy gatamah do hadoo ý baher'oot ta tii. ²² Eber buuj had'oo mäh, sa nooh. Ý na-ããj hë Eber buuj. Isaraéw buuj had'oo mäh, sa nooh. Ý na-ããj hë Isaraéw buuj. Abaraãm panaa had'oo mäh, sa nooh. Ý na-ããj hë Abaraãm panaa. ²³ Kristo karom had'oo mäh, sa nooh. Ý Kristo karom heh'ãät do sa bahãnh. (H'yy gatamah do her'oot do hadoo ý baher'oot ta tii da.) Tak'ëp sa bahãnh ý moo wãd wät. Sa bahãnh hajõõ nuu me ý radawäts gëet, Jesus ky n'aa ý her'oot do hyb n'aa. Sa bahãnh hajõõ nuu me tak'ëp ý rabahewyyh. Hajõõ nuu me dajëb gó ý bewãd nã. ²⁴ Ji ma poo oow pé nuu me ken'yuh 39 nuu me ý rabahewyyh ta tyd me, Judah buuj hã.^h ²⁵ Tamawoob nuu me ken'yuh b'aa t'aah me ý rabahewyyh.ⁱ Sét nuu me ý radajëeb paawã, pä me ý ramakut. Tamawoob nuu me marakate ý gahõm do tabegyb jëk. Sét adëb bã, sét atsëm ý batu tame. ²⁶ Hajõõ nuu me ý bawät. Äm n'aa nãng hã ýỹ, tamii ý mawät doo. Äm n'aa nãng hã ýỹ, moo nesaa do sa hyb n'aa. Äm n'aa nãng hã ýỹ, häj ý n'aa buuj wób sa hyb n'aa. Äm n'aa nãng hã ýỹ, Judah buuj nadoo do wób sa hyb n'aa. Äm n'aa nãng hã ýỹ, panang bã. Äm n'aa nãng hã ýỹ, ranabok hënh ý bawät bã. Äm n'aa nãng hã ýỹ, akajar me ý bawät bã. Äm n'aa nãng hã ýỹ, Jesus hã h'yy ka'eeh do ken'ooh do sa mahang. ²⁷ Tak'ëp ý moo wãd wät. Tak'ëp ý bakaanh ý moo wät do hyb n'aa. Hajõõ nuu me ý naỹỹh.^j Sah, hoo kaanh do na-ããj hë ý bahoop. Hajõõ nuu me ý waa tamah. Hajõõ nuu me ý bahoop hahëem doo. Hajõõ nuu me dooh saroor hebaan do wë ýỹ, ý kahat'ëeh hyb n'aa. ²⁸ Sahõnh hë ý ahoop do wób bahãnh ti anãng nã sahõnh hë Jesus hã h'yy ka'eeh do jë pad'yyt habong do sa hyb n'aa ý hyb n'aa tón do had'yyt hë,

^g 11.21 Ma matëg oow sa kyyh hyb n'aa Paw-Ro wén e'ees. Nahejooj its Paw-Ro, sa nooh. Dooch Paw-Ro nu mebyy heh'ãät tado bã. *Hãd nu mebyng* tawén nãng, ma matëg oow ramoo bok do hã rah'yy genãh takarën do hyb n'aa.

^h 11.24 Jããm né hë 40 nuu me ji bahewyyh do séd noo gó, Judah häj n'aa buuj ky n'aa jaw'yuk do an'oo bã rasãm baanh. Ranesõõts hõm hyb n'aa ti yd jë rabetsën. 39 nuu me rabahewyyh.

ⁱ 11.25 Roma buuj ti ky n'aa etyy do b'aa me rabahewyyh.

^j 11.27 Ta see pé noo gó Paw-Ro moo wät atsëm ta waa sãm hã. Ta see pé noo gó Jesus ky n'aa tama metëek atsëm. Ta see pé noo gó taky n'aa etsëe atsëm, ti hyb n'aa ty jawyg tabahoop.

Jesus karēn doo da rababok ŷ karēn do hyb n'aa paawā. ²⁹Rah'yy kanejój bā kā Jesus hā rah'yy ka'eeh do hā, ŷ t'yyd mehīin sa hā, ŷ hyb n'aa tón hēp ŷŷ gó sa hyb n'aa. Nesaa do ta see moo wād bā rah'yyb tatuk do hyb n'aa, tak'ēp ŷ h'yy katón ta ti hedoo do hyb n'aa.

³⁰ŷ h'yy kasabé bā, jāām hē né hē ŷ h'yy kasab'ee da ŷ nahejooj is do metēeh do hā. ³¹Dooch daap ŷ menā bā P'op Hagā Do ji j'aa etsēē had'yyt doo, Jesus Kristo Tak'ēp Hyb N'aa Jawyk Do h'yy kaha'eeh doo, ta Yb, hapäh. ³²Damas-Ko panang hēnh ŷ hewād nā noo gó, panang bagā n'aa sa wahē n'aa Aretas hād nāng do wē moo wāt do mejūū panang hadē do noo bā warahén ŷ ragada ŷ ramosoo hyb n'aa. ³³Tii d' radoo né paawā, arook gó Jesus hā h'yy ka'eeh do ŷ rabahy g'ēēd is tūū, panang hadē pong jé naa. Tii bā ŷ kejēn hōm is sa mahānh.

12 Dooch né paawā ŷ genaag bā, ahōm nā ŷ h'yy kasab'ee do ran'oo bā, daap né paawā ti ta tii. Bē ŷ maher'oot hŷŷ kā s'ēēh hadoo do Tak'ēp Hyb N'aa Jawyk Do anoo do hā ŷŷ. Bē ŷ maher'ood kán na-āāj hē hā ŷ tametēeh doo. ²ŷ hapäh aj'yy Kristo hā h'yy ka'eeh doo. 14 däg ta baab tabēēj hōm doo, P'op Hagā Do mahūūm dó hŷ pong jé, ta wē. Dooch ŷ hapēē bā ta h'yyb tym ub tado bā t'īī hēnh hasēēk doo, ta hub sii hē tado bā. P'op Hagā Do ti hapäh. ³⁻⁴ŷ hapäh né hē hŷ pong jé P'op Hagā Do masäk. (ŷ ab'aanh, dooch ŷ hapēē bā ta h'yyb tym ub tado bā t'īī hēnh hasēēk doo, ta hub sii hē tado bā.) T'īī hēnh ta ti aj'yy^k maa napäh kyyh ji nahajaa do ji her'ood bā, P'op Hagā Do nanoo do ji er'ood bā.¹ ⁵Ti hadoo do aj'yy hyb n'aa ŷ haja paawā ŷ kasabé bā. Hā ŷŷ hē dooch ŷ h'yy kasabé bā. Hā ŷŷ hē ŷ kasabé bā paawā, jāām hē ŷ h'yy kasab'ee da ŷ nahejooj is do metēeh do hā. ⁶ŷ karēn bā paawā hā ŷŷ hē ŷ h'yy kasabé bā, h'yy gatamah do nado né paawā ŷŷh, né hup ŷ né hē paawā ta ti ŷ h'yy kasab'ee do hā. Ti hado né paawā, dooch ŷ h'yy kasabé bā. Dooch ŷ karēn bā ta bahānh ŷ rahyb n'aa newē bā. Jāām né hē hā ŷ rahapäh ŷ moo wāt doo, ŷ her'oot do na-āāj hē.

⁷Hā ŷŷ hē ŷ h'yy kasabé mahānh, tak'ēp hetsooh do kametā dāk do hyb n'aa hā ŷŷ, P'op Hagā Do anoo hā ŷŷ nesaa do ŷ ahoop doo,

^k 12.3-4 Ta daaj hē, ta ky n'aa né hē Paw-Ro her'oot. Ti né ti aj'yy hŷ pong jé P'op Hagā Do masäk doo. Kejēn doo gó Paw-Ro wén her'oot, dooch takarēn bā tah'yy kasabé bā do hyb n'aa.

^l 12.3-4 P'op Hagā Do wén nanoo kyyh tamaa napäh do ter'ood bā, tak'ēp tabahetsooh do hyb n'aa. Dooch ēr haja nā bā ta ti hadoo do ēr gado bā badāk hahŷŷ hā ēr babok nā bā.

sasəng tēg ejoooh do hadoo ji. Nesaa Do Yb mejūū do tii, ỹ tarejāā hyb n'aa, hā ỹỹ hē ỹ h'yy kasabé mahānh. ⁸Tamawoob nuu me Tak'ēp Hyb N'aa Jawyk Do hā ỹ betseē tabado hōm hyb n'aa ta ti ỹ ahoop doo. ⁹Tii d' né paawā, hahỹỹ da ta kyyh hā ỹỹ: “Jāām hē né hē ỹ ky enyym do a hā, sahōnh hē hejój ỹỹ baad takametā dāk do hyb n'aa nahej'oonh do sa hā”, nāng ta kyyh hā ỹỹ. Ti hyb n'aa kā, tsebee gó ỹ h'yy kasab'ee ỹ nahej'oonh do hā, Kristo hejój bawät hyb n'aa hā ỹỹ. ¹⁰Ti hyb n'aa kā ỹ tsebé Kristo hyb n'aa nahej'oonh do ỹ ahob bä, Kristo hyb n'aa ỹ raky n'aa rejā bä, Kristo hyb n'aa wē ỹ badoh do ỹ ahob bä, Kristo hyb n'aa ỹ rarahejā bä, Kristo hyb n'aa dooh ỹ ad'oo pé na-āāj hē. Ỹ nahejooj bä, hēp ỹ tym hā ỹ bahej'oonh.

¹¹H'yy gatamah do her'oot doo da ỹ ber'ood dāk. Bē né ti han'oo tii d' ỹ wén her'oot. Bē né paawā tii baad her'oot do kēh ỹ n'aa hā. Dooh its né paawā ỹỹh,^m dooh tabad'op hē Jesus ky n'aa rod sa bahānh red'oo do sa yd jé ỹỹh. ¹²H'yyb jawyk doo me ỹ moo wäd wät bē mahang Jesus mejūū do heh'äät ji do bä metēeh doo: Hetsooh do P'op Hagä Do hanaa ỹ metä wät, meuj n'aa nāng do ỹ moo wäd wät, ỹ pehuunh do na-āāj hē. ¹³Ny hadoo do ỹ moo wäd wät ta wób Jesus hā h'yy ka'eeh do hā, bē hā ỹ moo nawäd wät doo? Jāām né hē hahỹỹ bē hā ỹ nad'oo doo: Bē ỹ daab nayyp doo! Bē mabaan ta ti hyb n'aa bē ỹ ky n'aa rejāā hadoo doo.ⁿ

¹⁴Tamawoob nuu me däg bē ỹ bahehēen da hỹỹ kā. P'aa hēnh dooh né da bē ỹ daab yb bä ēnh. Bē ma nado ti ỹ karēn. Bē ti ỹ karēn sa yb sa taah karēn doo da. Ji taah ned'ēed is do nado sa yb sa ỹyn karēn do hanoo doo. Sa yb ti sa taah nad'ēed is do karēn do hanoo doo.^o ¹⁵Baad ỹ h'yyb hedoo sahōnh hē ỹ ah'ēenh wē ỹ hanāng doo, ỹ kan'oo dāk bē hā bē ỹ masa hyb n'aa. Ỹ eanh hỹỹ kā bē hā: Dooh denaa hē ỹ bē kamahān, tak'ēp bē ỹ kamahān do mabaj?

¹⁶Hahỹỹ d' mä bē mahang habong do sa nooh: “Te hub né hē. Dooh bē tadaab yb bä. Dooh né paawā bē tadaab yb bä,

^m 12.11 *Dooh its né paawā ỹỹh* Paw-Ro wén her'ood wät, dooh né ji hajaa péh P'op Hagä Do tanado bä paawā. Ta ti tabahe'oot bä tapes'āap na-āāj hē ta hā ky n'aa rejāā doo. “Dooh its Paw-Ro”, nāk sa kyyh.

ⁿ 12.13 Sāhōnh hē ta wób sa mahang tamoo wäd wät doo, Korīn buuj mahang na-āāj tamoo wäd wät. Jāām hē dooh tadaab yb bä sa hā. Ta wób hā ti tadaab yyp. Ti hyb n'aa apāh dooh baad Paw-Ro kamahān sa hā ta wób red'oo. *Bē mabaan bē hā ỹ daab nayyp doo* Paw-Ro bahe'oot bä, tahād ky n'aa e'jees. Nesaa do nado ti ji da hadoo do ji daab nayyp doo.

^o 12.14 Korīn buuj Jesus hā h'yy ka'eeh doo, Paw-Ro taah hadoo. Dooh Paw-Ro karēn bä sa dajēer tagado bä. Takarēn tamasa sa hā, baad Jesus hā rah'yyb padēek hyb n'aa. Sa yb hadoo Paw-Ro, ta hyb n'aa Jesus hā rah'yy kae dāk do hyb n'aa.

kamatakëe doo me bë tawedii”, nãk sa kyyh. ¹⁷ Ajyy bë wë ÿ mejũũ do hã bë ÿ wadii bë hã? ¹⁸ Tak'ëp paa ÿ betseë Tiit bë wë tabahõm hyb n'aa. ãã h'yyb hata ÿ mejũũ ta sii ti noo gó. Bë Tiit wadii, bë hã pëh? Sét hëp ÿy Tiit daheeh. Séd h'yyb hedoo ãã babok Tiit daheeh. Dooh bë ãã wad'ii bã.

¹⁹ Ta ti ãã wén her'oot bë hã, ãã kawoom hyb n'aa bë ed'oo g'eeh? Dooh. Dooh ti hyb n'aa tado bã. Séd ãã h'yyb hedoo Kristo hã. T'öp hanäng doo me ãã baher'oot sahõnh hë ãã her'oot doo. P'op Hagä Do maa napäh ãã her'oot doo. Najis haa, sahõnh hë ãã bad'oo doo, bë hyb n'aa né hë tii, baad tabahadoo hyb n'aa bë hã, Jesus hã bë h'yy ka'eeh do kah'ũũm hyb n'aa paawä. ²⁰ ÿ eÿÿm, bë wë ÿ kajaa bã, ta see hadoo bë h'yyb hã ÿy da. Tii bã, dooh na-ããj hë bë genaag da bë ÿ maher'ood bã. ÿ aw'yyt apäh da bë mahang kaj'õök doo, h'yy kajew'ëes doo, kawajãän doo, séd hã h'yyb nahed'oo doo, ta wób ky n'aa rejãã doo, kasab'ee doo, kamanejũũ do na-ããj hë. ÿ hyb n'aa newë bã, ÿ hyb n'aa tón ta ti hedoo do ÿ awyyd bã da bë mahang. ²¹ ÿ eÿÿm da, bë wë ÿ kajaa bã p'aa hënh da ÿ nu mebyng bë hyb n'aa P'op Hagä Doo, ta hã ÿ h'yy kaha'eeh do an'oo bã. ÿ hyb n'aa tón da ÿ eÿÿm, pooj jé nesaa do moo bok do rat'yyd kamaneh'iin do hyb n'aa baad nadoo do ramoo bok do hã, sa ÿÿm sa patug nadoo do sii rabeÿÿh do hã, nu meby n'aa näng do hã, sa matym gó ramoo bong doo.

Tagadëëg ub Paw-Ro maher'oot do ky n'aa hahÿÿh

13 Tamawoob nuu me däg hahÿ bë ÿ bahehëen doo. ÿ kajaa bã, sahõnh hë ky n'aa katep'aa do bë mahang hanäng doo, pawóp hë, tamawoob hë ta rod n'aa raheer'oot da te hub tado bã.^p ² ÿ ab'aanh, pooj jé, pawóp nuu me däg bë ÿ bahehëen noo gó nesaa do moo boo bok do sa hã ÿ maher'ood wät doo. Ta ti moo hedoo doo, bë sahõnh hë na-ããj hë, ÿ maher'oot hahÿÿ da: Dooh da ÿ t'yyd mehiiin bã pooj jé du d'oo do nesaa do moo bok doo, ta wób na-ããj hÿÿ kã nesaa do moo bok doo. ³ Dooh da bë ÿ t'yyd mehiiin bã. Bë karën mäh, bë ÿ metëeh Kristo tado bã hã ÿ her'oot doo, bë nooh. Nahejooj nado Kristo bë wë. Hejooonh né hë bë mahang. ⁴ Nahejooonh doo gó b'aa kajatsëk do hã kepëem däg

^p **13.1** Tii d' né ji bad'oo P'op Hagä Do kyy kerih do ji tamaher'oot, ta see ta da hadoo do taky n'aa tapa bã. Dew-Teronom 19.15 hã takerii däk tii. Dooh ji ky dahé bã sét hë her'ood bã. Jáam hë ji ky daheeh pawóp hë, tamawoob hë hadoo doo, te hub né hë ranoo bã ky n'aa katapaa do ky n'aa. Tii da P'op Hagä Do kyy kerih do wén mejũũ, daap hë ji ky n'aa tapa mahãnh ji da hadoo do.

né paawä, ti awäd had'yyt hÿÿ kä P'op Hagä Do hejój hyb n'aa. Ti hadoo né hē äã hã. Kristo nahejooj hã séd hã äã h'yyb hedo né paawä, bë wë da äã babok Kristo sii P'op Hagä Do hejój hyb n'aa. Bë wë äã kajaa bä, ta hejój gó da äã babok bë wë.^q

⁵Taw'ääts hē bë ti bë hã hē bë kamety, bë hyb n'aa newë, Jesus hã bë h'yy kae bä heh'äät ub. Dooh g'eeh bë hapëë bä, Jesus Kristo bë h'yyb gó awät? Ta nehüb tado bä bë hegãã bä, dooh Kristo hã h'yy ka'eeh do heh'äät do bë do bä. ⁶Wyt ta maab hē bë hã ÿ gada, bë hapäh Jesus mejüü do heh'äät do ÿÿh.^r ⁷P'op Hagä Do hã äã ky n'aa etsëë, baad nadoo do bë moo nabok hyb n'aa. Dooh äã ky n'aa etsëë bä ta tii, baad bë mahang äã moo boo bok do ta wób rabaher'oot hyb n'aa. Dooh. Tii d' äã wén ky n'aa etsëë, baad hadoo do bë moo bok hyb n'aa. Ti né hē ti äã karën doo. Dooh ÿ hyb n'aa p'eed bä, baad nadoo äã moo boo bok doo, ta wób redoo bä. Jããm né hē ÿ karën, baad bë babok doo. ⁸Tii d' ÿ wén her'oot, dooh äã haja bä baad hadoo do äã geãm bä. Jããm hē äã hajaa äã moo bok baad hadoo do masa doo, kah'üüm do hanoo doo. ⁹Tsebee gó äã gadoo äã nahejooj doo. Jããm hē äã karën, baad Jesus hã bë h'yy ka'eeh. Äã ky n'aa etsëë bëeh, bë t'yyd kamehïin hyb n'aa baad nadoo do hã, p'aa hënh baad ub bë babok hyb n'aa. ¹⁰Hahÿ mo haja ÿÿ kerih do bë ÿ ma erih bë wë ÿ kajaa do pooj jé, bë wë ÿ kajaa bä kä, dooh hyb n'aa bë ÿ nabuuj gedoo pé hyb n'aa ky n'aa jawyk doo me, hã ÿ kan'oo däk doo me. Jesus, Tak'ëp Hyb N'aa Jawyk Do anoo ta ti ÿ ky n'aa jaw'yyk doo, baad hadoo do ÿ moo wät hyb n'aa bë hã, bë h'yy ka'eeh do kah'üüm hyb n'aa. Hã ÿ tabanoo ta ti ta ky n'aa jaw'yyk do bë h'yyb tym gó hanäng do ÿ rejãã hyb n'aa nado.

Paw-Ro kedëë hõm do ky n'aa hahÿÿh

¹¹Tagadëëg ub, wakän haa, bë tsebee. Taw'ääts hē bë t'yyd kamehïin baad nadoo do bë moo boo bok do hã. P'aa hënh baad hadoo do bë moo boo hÿÿ kä. Bë ky dahé hahÿÿ hã, bë ÿ ma erih do hã bë ÿ maher'oot do ta hã. Taw'ääts hē séd bë h'yyb hedo.

^q 13.4 Korin panang bä habong do wób raky sëm Paw-Ro. Dooh raky dahé bä. Nesaa do rakarën ramoo bok nä. Ti hyb takajaa do pooj jé Paw-Ro maher'oot sa hã. Pooj jé dó tat'yyd mehïin né paawä, dooh da tat'yyd mehïin wäd bä nabuj keh'üüm do sa hã. Kristo hejój gó Paw-Ro ky n'aa etyy da hÿÿ kä sa hã takajaa bä.

^r 13.6 Korin buuj wób ramejüü Paw-Ro metëeh Jesus mejüü do heh'äät do tado bä. Ti Paw-Ro mejüü sa daaj hë sa hã hë rakametyy rabahapäh hyb n'aa Jesus hã rah'yy kae bä, Jesus hã rah'yy kanae bä. Jesus hã rah'yy kae bä tii bä rabahapäh Paw-Ro Jesus mejüü do heh'äät tii, Paw-Ro hyb n'aa Jesus hã rah'yy kae däk do hyb n'aa.

Taw'ãäts hẽ hanãm doo gó bẽ babok bẽ da hadoo do wẽ. Tii bã da P'op Hagã Doo, ta hanaa ji kamahãñ doo, ta hanaa ji h'yyb nãm doo, awät da bẽ mahang.

¹²Taw'ãäts hẽ baad ub, hanãm doo gó bẽ edëe sahõnh hẽ bẽ da hadoo doo. ¹³Sahõnh hẽ Jesus hã h'yy ka'eeh do babã habong do bẽ rahyb n'aa esee.

¹⁴ÿ karẽñ, Jesus Kristo Tak'ëp Hyb N'aa Jawyk Do ky enyym do bẽ h'yyb gó tabawät. ÿ karẽñ ji P'op Hagã Do kamahãñ do sahõnh hẽ bẽ h'yyb gó tabawät. ÿ karẽñ na-ããj hẽ séd hã ji h'yyb hedoo P'op Hagã Do Sahee ji hã hanoo do sahõnh hẽ bẽ h'yyb gó tabawät. Jããm hẽ kä.